

Mud Volapüka

Nüm 61

16 yunul 2017

Bukemaboed

Fövot lekoned-mära yutopik
„Ventürs hieła ‚Nenolikan‘ e flenas omik“
fa hiel „N. N. Nosov“

Kapit degbalid. Pö top nulik.

Nenolikan esevälöfikom pö top go nesevädik. Äseatom su bed, mosadölo ini plümabed. Plümabed at äbinon so molik, äsif pebesteigädon me tarakaflors. Nenolikan pegalükon fa vögs nesevädik. Emaifükölo logis, älogom züo ed eküpom, das seatom pö cem foginik [no okik]. Kovenastulils smalik ästadons pö guls. Tapedils e pänots ko bepäns floras valasotik älagons pö völs. Tabil klöpik ko lögäd bal ästanon nilü fenät. Kum fadas valakölik pro brod älöon su on e broda-kusinil, löliko pedujoiköl me nads e peäns äsvo reinad brotik, äseaton su on. Nilo penamatab ästadon ko penamastömem. Bukaramar ästanon lä on. Lok gretik äkomon len völ fagikün nilü yan. Jicilils tel ästanofs fo lok ed äspikodofs. Balan älenlabof kloti blövik de vivot sadinik klilik ko zönül koo sadinik, kel pefäitanon pö bäk. Älabof logis blövik e heremi dofik peflököl ad flökot lunik. Votikan älenlabof kloti vielik ko florils rosadakölik e violätik. Älabof heremi blonik, ti vietik, kel vefiko ädonikon sui jots. Ämafidof lädahäti lä lok ed ai äsnätörof äsvo piak.

„Lädahäti kio neplitik! Ga binos ai badiko pö mod alik ad lenükön häti. Ävilob jafädön lädahäti ko siem vidik, ab stof saidik ädefon, ed ämutob jafädön oni ko siem rovik, ab ven siem binon roviku



tän logod logoton glöpöfiko, ab atos no binon so jönik [äsif pö siem vidik].“

„Saidos ad mufedön po lok kol ol! No kanob sufodön ven mufedoy po lok“ - jicilil blövalogik esagof.

„Ab lü kis, cedü ol, idatuvoy loki?“ - blonikan ägesagof.

Elenükölo häti ti ebo len nük, blonikan egejedof kapi ed älülogetof lü lok, nabükölo logis.

Nenolikan äsenälom droli. Egrunom, no etaetölo smili. Blonikan sunädo ejutedof de lok ed eprimof ad logetön miniludiko lü Nenolikan.

Ab Nenolikan efärmükom logis ed äsimulom slipi [äjinom slipön]. Älielom nilikön lü bed, steifölo no tagön me jukahilots, ed stopikön nilo jicililis bofik.

„Ejinos kol ob, das esagom bosí“ - Nenolikan elelilom visipi. - „Bo, te balugiko atos etikologädon... Kitimo usevälöfikom üfo? Sis ädel seatom nen sevälöf.“

Vög votik egesagon:

„Jiel ‚Pulmonar‘ no ebüedof galükön omi. Utan esagof, das omutob vokön ofi, ven it ugalikom.“

"Kifu binof Pulnomar at?" - Nenolikan etikom, ab no ejonülom [no esäklänedom oki], das lelilom spikoti ofsik.

„Hicilil kio kuradik!“ - visip dönu pälilon. - „Ga äflitom pö bälun!“

Nenolikan elelilom, das ekaladoy omi kuradiku, e mud omik okao [ok it] etenikon ti jü lils. Ye pötatimo eküpom atosi



ed etaetom smilüli.

„Ulükömom poso [latikumo], ven ugalikom“ - vög älaisagon. - „Vilob vemo dasäkön ome bäluni. Ba labom-la breinikonkudi!“

„Bö!“ - Nenolikan etikom. - „Leno labob breinikonkudi.“

Blonikan edönulogof ed mogolof. Stil äsökon pö cem. Nenolikan lunüpo äseatom ko logs färmik, dalilölo küpälo. Fino emaifükom bosilo logi bal ed eküpom kapi jicilila blövalogik ebiegädöl love om. Jicilil esmilülof flenöfo, täno etrubikof ed, etädölo me doat, esäkof:

„Ai galikor-li so? Balido [büiküno] maifükor logi bal, pas täno votiki.“

Nenolikan enutom siiko ed emaifükom logi votik.

„Klu leno slipor-li?“

„Nö, anu egalikob.“

Nenolikan esteifülom ad sagön nog bosu, ab jicilil epladof doatili len lips omik ed esagof:

„Seilorös, seilorös! Binos nevipabiku ad spikön kol or. Malädülör vemo.“

„Lenö!“

„De kis sevor atosi? Binor-li sananu üfo?“

„Nö.“

„Ekö! no binor sananu, ab lesagor atosi. Mutor seatön takedo, jüs udugob isio sanani. Kiniku binon-li nem orik?“

„Nenolikan. Ab lio nem orik binon-li?“

„Panemob: jiel ‚Ji-blövalogikan‘“.

„Nem gudik“ - Nenolikan eküpom nemi baibiniki.

„Fredob vemo, das ut pliton ori. Binor jicililu plütik.“

Smilil veitiko epubon pö logod Nenolikana. Äkotenom vemo, das eloboy omi, bi ti neai pälobom, ab ledino [mödädilo] pänofom. Hicilils fabinoms nilo, e Nenolikan



no ädredom, das häoy omi kodä flenom ko jicilils. Klu äspikotom ko Jiblövalogikan go leliviko e plütiko.

„Ab lio etan panemof, ji>votikan?“ - Nenolikan esäkom.

„Jivotikan kifik?“

„Äspikotor ko ji>kelan. Ji>jönikan ko herem vietik.“

„Ö!“ - Jiblövalogikan evokädo. - „Igalikor ya bu lunüp üfo?“

„Nö, imaifükob logis te ad dü timül, e poso sunädo islipikob dönu.“

„Neveratö, neveratö!“ - Jiblövalogikan esvönükof kapi ed etrubükof logabobis [efronükof flomi]. - „Vo-li cedor obi nesaidiko jöniki?“

„Lenö!“ - Nenolikan edredikom. - „Koo binor jöniku.“

„Üfo kif binof jönikünu bevü obs ma ced orik: ob u of?“

„Or... ed of. Obs bofik binofs vemo jöniku.“

„Binor luganu miserabik, ab benädob ori“ - Jiblövalogikan egesagof. - „Jijönikan orik panemon: jiel ‚Nifaflogül‘. Ologor ofi dönu. Ab nu saidos. Binos dämabiku ad sagön mödiko kol or. Seatolös takedo e no steifülöröd ad löädön se bed. Nu udugob Pulmonari isio.“

„Kifu binof Pulmonar at?“

„Pulmonar binof sananu obsik. Olekälof ori.“

Jiblövalogikan mogolof. Nenolikan sunädo ejutedom se bed ed eprimom ad sukön klotemi okik. Ävipom defugön suniküno, bi äsevom, das sanans



löfilons ad nulüdön [lekälön] malädanis okik me kastor e smivön onis me yodina-tintur kel vemo hitükon koapi. No etuvom klotemi zi, ab pup, kel äseadon su bamil smalik, stutölo me len bäk ta völ, eküpälükon omi.

Nenolikan ävilob ebo sunädo däbreikön pupi e vestigön: kis papladon ninü on - vod u cibils. Eglömob suki klotema okik ed eprimom ad sukön neifi, ab elogom lokamamagodi pö lok. Ejedölo pupi sui glun, eprimom böfön lä lok, logodajästölo e lülogetölo logodi okik. Efilülogetölo bundaniko [saidiko], esagom:

„Ab koo binob jöniku, e logod obik no binon tu glöpöfiku.“

Süpo tag stepas ätonon pödü yan. Nenolikan vifiko ejutedom ini bed ed etegom oki me bedateged.

Jiblövalogikan enügolof ini cem kobü jicilil votik: lenlabü mäned e häti sanaviks vietiks, ko trökil smalik braunik pö nam. Älabof cüg-ül-*is* klöpöfülik redülik. Log-ül-*s* gedik älülogons fefiko pödio de lün sirköfik hornik [ko frem binü horn]. Nenolikan etuvedom, das atan ebo binof Pulmonaru, tefü kel Jiblövalogikan äsagof ome.

Pulmonar emufükof stuli ad nilü bed Nenolikana, epladof trökili okik sui on ed, posä esvönükof kapi, esagof:

„Hicilils at kion! Ai etans datikoms dädükiälotis seimik! Kikodo änedos ad flitön pö bälun kol or? Seilorös, seilorös! Sevob utosi, keli osagor: no obitob somiko denu. Hicilils valik stetoms atosi, ab poso dönu primoms ad dunön munosis [ludunis].

Pulmonar emaifükof trökili, e pos brefüp äsmelos pö cem äs yodinatintur u medin seimik votik. Nenolikan eblotikom dub dredäl. Pulmonar eflekof oki lü om ed esagof:

„O malädan, löpio-tovoröd koapi.“

Nenolikan eprimom ad nexänön se bed.

„No löädoröd, o malädan!“ - Pulmonar esagof fefiko [seväriko]. - „Ga büedob ori



seidön oki penditiko.“

Nenolikan etovülom jotis ed eseidom oki pö bed.

„No tovülörös jotis, o malädan“ - Pulmonar eblametof. - „Dajonoröd linegi.“

„Lü kis?“

„Dajonoröd, dajonoröd. So nedos.“

Nenolikan esleifom linegi plödio.

„Sagoröd: ‚a‘.“

„A-a“ - Nenolikan esagom nevifiko.

Pulmonar esüramenof rüdili boadik se trök ed epladof oni len blöt Nenolikana:

„Natemoröd dibätiko, o malädan.“

Nenolikan eprimom ad bruvön äsvo stemacaf.

„Nu no natemoröd.“

„Gy-gy-y!“ - Nenolikan esagom nevifiko, lemufölo sekü smil.

„Sekü kis smilor, o malädan? Esagob-la nosi drolik!“

„Lio kanob löliko no natemön üfo?“ - Nenolikan esäkom, laismilölo.

„Fe no kanob ad no natemön, ab ga mögos ad taetön natemami dü timüls anik.“

„Mögos“ - Nenolikan esiom ed estopedom ad natemön.

Efiduinölo xami [dalogami], Pulmonar eseidof oki lä tab ed eprimof ad penön rezäpi.

„Malädan orik labom blütoti pö jot“ - esagof Jiblövalogikane. - „Tävorös lü drogöp, us ugivoy ore mäplati mielik. Udekötorös diledi mäplata ed upladorös oni len jot malädana. E oneletoröd omi ad löädön se bed. If



ulöädöm, täno ubrekotom stömemi lölik orik ed uviodom flomi seimane.
Nedos ad bitön seväriko kol hicilils.

Pulmonar emoblinof rüdili okik ini trök, ed emogolof posä nogna
elülogof Nenolikani seväriko.

Jiblövalogikan esumof rezäpi dese tab ed esagof:

„Älelilor-li atosi? Nedos ad seatön kol or.“

Nenolikan elogodanotodom saäbälalogodi begesagü atos.

„No logodajästorös. E no desinorös ad sukön klotemi okik: ut
peklänedon fa ob gudiko“ - Jiblövalogikan esagof ed edegolof dese cem ko
rezepe pö nams.

Reidolsös fövoti konota pö nüm fovik.